


湖廣通志

自六十三至六十四

孝子
義士
義民義僕附

內閣文庫	
番號	漢 14208
冊數	100 (61)
函號	奧 130 1





湖廣通志卷之六十三

孝子志

長沙府

東漢古初後漢書鄧暉傳長沙有孝子古初遭父喪未葬隣人失火初匍匐柩上以身捍火火為之滅暉甄異之以為首舉

南北朝孫普濟楚紀長沙人南齊時居喪未葬隣火將及舍普濟號慟伏棺上以身蔽火焚炙將絕累日乃蘇宋陳道周楚紀湘潭人少孤家貧奉母至孝母歿廬墓自陶甄墓側歷四年斃墓高近三丈墓成而道周亦殞因紉母旁穴鄉人樹碣曰孝子墓

孫景修蘓轍集太常少卿長沙孫景修少孤而教於母
母能就其業既老而念母之心不忘爲賢母錄以致其
思既又集古今家誡得四十九人以示轍曰古有爲是
書者而其文不完吾病焉是以爲此合衆父母之心以
遺天下之人庶有益乎轍讀之而歎曰慈孝之心人皆
有之特患無以發之耳今是書也要將以發之歟雖廣
之天下可也

賀德英姓譜湘鄉人七歲能文淳熙間父以訟繫獄乃
詣縣自乞庭試以贖父罪令問所習對以通毛詩春秋
詔孟策與詩賦令各出一題援筆立就遂薦於朝與金
起巖等同試德英第一

元許穎湘陰人母彭氏卒水漿不入口三日哀毀骨立
葬踰月芝草生墓側人以爲孝感云祀鄉賢以上舊通志

明邵敏姓譜湘陰人進士事母孝母歿廬墓三年一夕
有虎來墓所忽見數鹿逐之去墓傍產芝數本詔旌其
門

黎維瀏陽人性孝謹父病祝以身代及歿哀毀幾絕廬
墓三年家隔在水南五里偶以事歸雖夜必往一夕無
舟有人艤舟以渡有頃不見人以爲孝感云

陳嘉謨湘潭人事父母以孝聞母病喘每雞鳴大劇
謨必起以身翼之其妻淪湯立侍寒暑不間者四十年
母葬雪擁柩不得前謨跪雪中哀號及兆大霽見舊通志

劉端明一統志寧鄉人性純孝領天順己卯鄉薦授潮州府同知以艱歸廬墓三年補同知西安府開涇陽廣惠渠引涇水溉五邑田七千頃致仕歸囊無餘蓄歲享必豐有司以端孝行聞詔旌表其閭祀鄉賢

蕪純湘陰人弘治間鄉舉無子置妾值母病竟不就室母歿哀毀骨立廬墓三年不見齒不面妻妾當事欲以聞純固止之竟以哀過病卒見府志

唐斯盛湘潭人天性純粹事母孝謹母嘗以細過怒其下斯盛負杖膝行以進母意便解家人事之者皆云自幼至老未嘗見其有怒也登萬曆中進士任蕪州司理以除惡忤當路改教衢州捐俸置學田以養寒士累官

至南京戶部郎見舊通志

曾汝京益陽人少孤授徒養母母歿哀毀廬墓數尚廉隅顏所居堂曰日省子賢聘值流寇剽掠爲邑令陳斗翔畫守禦策邑賴以全見縣志

李先登善化人明經善屬文性孝友獻賊陷長沙負母逃匿幾不免母歿哀毀垂老孺慕愈篤教其異母弟以身爲師其弟與子後先皆領鄉薦見舊通志

王清龍德溥茶陵舉人性篤孝友讀書別館中與弟同臥起者十餘年病劇命家人以素衣斂曰吾不克終子道服此以志憾也見舊通志

劉象賢湘鄉人領鄉薦事寡母孝謹婚嫁其兄之子

不異已子

易正言湘鄉諸生天性純孝廬墓除服又七年然後歸事母盡色養終身不懈著周易講義易氏家訓康熙五十一年奉

旨旌門

張懷湘陰人獻賊之亂懷甫十齡扶其祖存義奔出北賊執之將殺存義懷以身翼蔽連受數刃伏哭求訴詞轉婉切賊亦感動遂得俱生頸臂月痕至老如舊早失母事繼母盡孝父歿廬墓三年哀毀幾滅性見者爲之流涕

張元凱湘潭人天性孝友方居母喪而亂作家人驚竄元凱儼然長次朝夕奠食有勸其避匿者曰棄親偷生吾弗忍也流寇聞而感歎戒勿犯張孝子與弟元龍自少相切劘爲學康熙癸卯同舉於鄉元凱令蓋屋以惠愛爲政甫半載卒於官

黃玉鉉湘潭歲貢生居父母之喪雖遭亂離葬祭無失禮父性喜施予每歲祿出廩粟以振乏絕父歿後恒舉貸曰此吾父志也

曾登遼湘潭人諸生貢太學天性至孝生事盡力慎終盡禮父母所愛之人終身敬之父母老好施隣曲登遼承親善意惠周里閭迄今有感思之者

李有藻善化諸生甫八歲母病篤焚香告天願以身

代母歿哀毀數日不食遭亂播遷能孝養其父有穀百餘石莊戶失火延燒欲鬻其妻以償亟止之日使汝生離吾寧餓死

溫世儒益陽人康熙壬子舉人父崑來死獻賊難世儒甫六歲號泣不已人異之兄病侍湯藥七十日不倦吳逆構亂徵世儒逃避不辱

龍化麟攸縣諸生父病禱天減算以代事母出告反面視膳問安自少至老如一日大兵勦捕吳逆餘孽化麟請於大帥榜諭招安株連者悉免

夏之鳳攸縣人癸巳舉於鄉家貧嗜學葬父路險肩引折肱教養孤姪曲有恩意

文人合長沙人甫四歲祖母失明舐之復愈父癯窮滌澣器衣不解帶兄早逝視姪如子分畀田百畝少涉獵百家旁通方伎晚乃專精舉業七十始中癸巳副榜年八十卒

衡州府

五代譚進頗鄱人馬殷據潭州遣使徵四方丁壯授進頗左殿直大將軍家書至報父喪母疾潛然流涕上書乞治喪不許退語其下日吾不終養吾母將何以見先君於地下浩然而歸有司言進頗擅離軍次王自將兵討之進頗聞之曰死以孝吾何恨焉乃血指寫書自陳無叛意書畢自刎

見舊通志

孝子

元李孝子臨武人逸其名以孝友著至正間詔旌其閭
見舊通志

明歐陽志安仁人親喪泣血三年不入私室凡喪葬率
族人行古禮焉

謝海安仁人童時猛賊寇抄父庸被掠去其大父爲言
之輒涕泣不自勝旣長遂詣猛界贖之不可得乃存想
刻木爲父像針取指血滴瀝注之營坐域以禮葬之廬
墓三年後傾成化癸卯鄉薦授惠州通判值苗賊叛痛
憤勦平卒於官

王世忠衡陽人事繼母篤孝繼母病躬侍藥餌至爲嘗
糞以驗疾淺深年七十卒郡守蔡汝楠表其墓

甯允伯衡陽人以鄉貢任臨川教諭母王疾亟允伯剖
臂肉和藥以進母尋愈 以上見舊通志

廖珊楚紀衡陽人博學工文詞弘治辛酉鄉試第一正
德戊辰進士授行人轉司副以憂歸珊事親孝父性嚴
峻怒則長跪終日命之起則起以詩禮教授里中從遊
者多發聞於世直指毛伯溫首薦而珊不及待用

謝思本耒陽人父誼嘗爲豪彊誣禁思本甫髫齡捐軀
質辯乃解由鄉舉知龍巖縣清操自持賢聲甚著

甯惟成衡陽人母廖邁疾瀕危割左臂肉和膳以進母
病獲痊郡守劉春兵憲吳中偉共表其閭後以鄉貢授
長沙教諭年九十終

艾朝偉臨武人嘉靖間猖獗爲寇朝偉父母年並七十賊猝至朝偉於妻子無所顧先負其父往匿山中再還負其母母已被執朝偉曰貨貨俱在幸釋老母賊刃其母偉連呼吾死者三遂遇害

會朝簡臨武人領隆慶丁卯鄉薦事親孝謹出入必告萬曆甲戌就禮部試聞父訃自傷不及視含殮歸而拊棺大慟哀毀過甚卒於苦塊間事聞詔旌孝子復特賜進士以慰泉下

江朝翰衡陽人其遷衡之始祖曰元秀書百忍字於堂壁後人感其行誼七世未嘗析爨朝翰與弟朝林彌篤孝友母黃病劇朝翰割股昏仆家人奔告朝林亦已扃

戶割股矣迺合烹以進母遂愈後母復病兄弟再割左股烹以進母病亦再愈母年至八十七乃終朝林之子文龍早孤衣食於朝翰事世父如父朝翰病文龍割股烹以進朝翰之子見龍泣曰奈何以苦吾兄復割股烹以進朝翰霍然起郡守劉春頰其堂曰一門四孝

朱景斐桂陽人居貧篤行父母歿皆廬墓三年哀毀骨立

畢應達衡陽人母感心疾應達嘗糞覺味苦默禱願以身代因割股煮糜進之母病頓起懷宗時舉孝子予冠帶復旌其門應達舟過洞庭遇風他舟多覆溺應達望檣上有光如燭得抵岸云

阮以頤常寧人獻賊之亂母胡年已七十六臥疾不能起以頤侍側願以死衛母以頤傷於兵而得全

潘體鄴縣人母病求肉遂割股以進病良已後遇虎不啞人感歎為孝感云

譚楚日鄴縣人生一歲而孤母疾篤焚香告天割股以進母旋愈知縣陳我養旌之為免其戶役

會宗卷臨武人家貧竭力供子職父病足扶掖起居出入十餘年不懈居喪盡禮當事旌之

杜能嘉臨武人少失母事繼母盡孝父老鰥居不離側者二十年父寢疾衣不解帶者兩閱月巡按溫臯謨疏請旌門

周祉鄴縣人父希堯能詩工畫蚤卒祉為腹子以孝友著由歲貢任常寧訓導

國朝康熙十四年以祉子士嚴官學正

覃恩贈將仕郎 以上俱見舊通志

皇清譚振萃鄴縣諸生值大疫母卒流寇復漸逼棺不得具振萃與母屍同寢三夕哭擗不止亦卒

羅應元鄴縣諸生以孝聞母譚病目時避兵萬陽山中無醫藥應元舐之旋愈邑人化之

陳國寶常寧人母羅氏病不起徧訪醫術有道人界藥少許言得人乳頭其煮服之可愈寶遂禱祝割雙

乳和藥以奉母果驗縣令張問明召視申請旌孝

陳積芳藍山縣諸生事親能孝養父歿哀毀廬墓有司表其廬

黃星顯藍山人少為諸生父客始興卒星顯宵奔扶

櫬徒跣而歸廬墓側哀毀柴瘠遂以身殉以上舊志

宋之素衡陽歲貢生至性天植行身踐規矩歲饑食

粥而奉親甘旨無缺遭明季寇掠保護孤姪既長育

而教之子薊齡孫士莊同榜舉人

羅琥衡山人少孤母董守節孀居琥事母色養四十

年歲饑常出粟以振貧乏族有兄弟自鬻者歲久蕃

滋合男女九人琥代償其直遂得歸邑令高其義屢

舉鄉飲辭不赴年八十六卒

永州府

南北朝宋蕭孝子冷道人軼其名舊有祠在文昌門內

褒忠廟後今基址畧存按孝子舊載趙宋時人府志云

冷道中和鄉人則劉宋時人也

宋唐傑宋熊彥謀唐孝子碑永州東安民唐傑生四歲

卽知孝愛繼祖母蔣氏老而失明傑戀不去左右七歲

抵蔣日輒有光劇賊孔彥舟犯東安盡驅掠邑人傑號

泣詣賊營負蔣以出賊義而捨之母有奇疾食時胸腹

彭亨或教以導氣法葦吸惡滿口母卽氣通得食如是

三年父卒以舌舐屍代沐浴既葬廬墓哀動山谷所居

忽生異木一幹三花若堆錦起地數尺合理而上紹興

丁卯彥謀守零陵邑父老言上其狀朝廷謂傑孝行顯著宣付史館賜以束帛今十有一年矣傑哀慕不少衰其父母家傍復生連理木園之果蔬皆同蒂雙實全永之間聞傑之風翕然慕之祀鄉賢

李文珍東安人性篤孝母鄧氏獲異疾思魚作羹時寒
五冰堅文珍禱於潭鑿冰得魚供母遂愈越三年疾復
作文珍禱之應如前人以爲孝感名其潭曰孝子潭咸
淳中詔旌門閭賜粟帛卒祀鄉賢 見府志

元唐筆零陵人幼嗜學事母至孝母終廬墓側哀毀踰
禮嘗寫蓮華經一日觀音現像於巷中人以爲誠孝所
格 見舊通志

明陳旺永明人九歲能文事親最孝母病朝夕祈祝衰
食俱廢年八十舉於鄉尋卒

劉平生寧遠人事嫡母至孝其家被猛賊焚劫平生自
外歸求母不得將自投火中以救免後於爐中得母骨
誓死復讐赴京具奏辭極酸切朝廷爲發兵勦捕

歐陽震寧遠人性至孝父喪哀毀旣葬廬墓哭泣無時
里中稱孝

胡湘零陵人性至孝父母相繼歿廬墓六載有司表其
門 以上見舊通志

張機楚紀祁陽諸生父歿哀毀骨立廬墓三年正統間
有司以聞詔旌表門閭

趙應奎寧遠人舉人昂之子親喪盡哀教迪兩弟宗黨咸以孝友稱之

郭蕙寧遠人幼孤自八九歲卽知孝母家貧不能具甘旨或經商外歸母問所得必應曰有聲色懽甚以慰悅其母兄蘭早世撫孤姪如子迄成立不衰

楊成章道州人父泰爲浙江長亭巡檢妻何氏無子納丁氏女爲妾生成章泰卒成章甫四歲何將扶櫬歸丁氏父與之子而奪其母母乃剪銀錢與何別約各藏其半俟成章長授之越六年何臨歿授成章半錢告之故成章嗚咽受命旣冠娶婦月餘卽執半錢往浙中尋母母先已適東陽郭氏生子曰珉而成章徧訪之無所遇

弘治十一年遇珉於西江舟次兄弟各出半錢合之成章赴東陽侍養母卒廬墓三年始歸嘉靖十年事聞授成章國子學錄卒祀鄉賢

歐陽寧寧遠人少孤事母何氏晨昏將順無不得其懽心兄弟友愛一飯不忍違寧妻李氏卒有遺孤繼妻王氏視若已出人稱其家子道弟道妻道母道咸無愧焉蕭華道州人事母孝母卒廬墓三年兒女子患痘嘗一至家隔垣呼而問之

文一元祁陽人幼孤家貧業織巾以供母母病割股以療郡守王俸躬詣其廬榜曰節孝之門復其戶役周淑永明人叔母撫爲嗣淑備極孝養其所生父歿雖

降服心喪盡三年於異母兄弟尤篤友愛登萬曆丙辰進士爲重慶司理卒

徐時述永明人事親盡色養宗黨貧乏者悉周之

羅鵬雲祁陽人家貧力作養母甘旨無闕母病割股以進旋愈

申諫祁陽諸生母孀居三十年奉養惟謹遇母疾終夜候伺安否不令母知母卒廬墓三年

管朝用祁陽人父早世孝養其母母病經年侍湯藥非手調不供非口嘗不進歷寒暑不少倦

龍德昇祁陽人事母盡孝母遘疾危甚德昇焚香祝天割股以療旋愈

李嘗芬祁陽諸生母病篤祁以身代母卒水漿不入口累日後值元旦撫棺一慟而絕

雷楚佐祁陽諸生力學養母母病垂危泣禱於文廟歸而剖肝以療方持刀跪剖忽昏暈仆地有白煙罩之不移時母病良已

陳邦鏡永明人父早世其母以過哀喪明嘗私誓曰母盲不拯何以生爲遂窆岐黃之秘晝夜虔禱妻周氏同心調劑未幾母目復明邑人稱爲雙孝

劉鍾傑江華人早孤孝於母母病篤臥雪籲天願以身代是夜母夢吞雪而愈事聞建坊旌表

蔣向榮零陵人萬曆己未進士性篤孝養親必具甘旨

肅衣冠以待食罷然後退自食初令大名調南樂有母訟子不孝向榮欲自投劾去民悔悟自責卒爲孝子陞至吏部郎中黜陟公正無敢于以私者及魏璫專政遂掛冠歸

桑愈高零陵諸生父喪能循禮家極貧乏爲季翁娶婦居鄉恭敬人有忿爭必婉言諭解甚則涕泣道之同舟患疫愈高素嫻醫手調藥以進其人獲再生暮年言及父母或食遇甘旨猶愴然泪下

伍就湯零陵人父學會得渴疾好飲泉水就湯日親汲泉數餅寒暑不倦如是者二十餘年一日大雨宅傍有石罅涌泉人以爲孝誠所感

晉一貫祁陽人事親敬養備至父年七十手足痿痺一貫日以身代之兄早卒撫兄之子如其子平生篤志經術以鄉舉爲彭水令

桑日昇零陵舉人父愈高醇行厚德日昇動履不違有貸其數十金者稟父命遂焚其券所著有易注若干卷以上見舊通志

皇清傅明賢零陵人順治五年粵寇圍城明賢負母以出門者不許其父先已出城明賢冒險往省之復還侍母哭而行其子操舟送之中途作絕命詞七章城中糧盡母聞鄰人爲兵所殘怖死明賢一慟而絕

蔣應豐零陵人世爲巫居唐公廟粵寇圍城三月糧

盡兵闖入廟中欲殺食其父應費匿神像後出跪曰
父羸老不堪請以身代兵釋父牽應費去殺之邑人
哀之立祠廟旁

蔣本生零陵人康熙癸卯鄉舉幼孤力學事母盡孝
母卒廬墓三年每舉聲長號聲徹郊垌有白雁從西
北來集於廬側拊翼悲鳴歲餘不去

黃簡祁陽人父用中避兵竹山為兵所執簡於嶺巔
望見馳下求以身代兵乃釋父刺簡死雍正六年奉
旨旌表

湯錫遴零陵諸生少失怙恃事其所生母王孝謹備
至昆季間友愛懇篤雍正五年

詔舉優行當事以錫遴薦奉

旨發往江蘓試用署張渚巡檢卒於官

寶慶府

宋黃達武岡人崇寧中割股行孝郡守以聞詔旌表其
門見舊通志

金彥楚紀新化人力學善屬文敦行孝友喜振困窶人
號義門金氏胡寅嘗記其事後牧守奉詔舉孝廉為天
下第一

聶致堯楚紀邵陽人事親孝臨財廉周給貧困邦人德
之列舉孝行節義十事守宰以聞詔表其門閭張栻為
之題額

海虞通志 卷之三
明梁德遠楚紀邵陽人洪武乙丑進士時父延用任郎中逮繫詔獄德遠不赴瓊林宴及父謫戍上言請以身代上閱其孝拜工科給事中命釋其父

趙漢鏞武岡人性孝友嘗拾道旁遺物悉以還失者洪武初舉孝廉任江西漕運同知

陳經邵陽人事繼母梁氏以孝稱兄弟五人同居貲產取其瘠薄者

方觀武岡人性至孝親喪哀毀欲絕終身廬墓其墓屋為牛所觸壞觀號泣其牛自斃又鼠嚙其祭器引罪自省一鼠旋伏祭器中若輪服狀舉而釋之院道旌表其門祀鄉賢以上見舊通志

周瑚三楚文獻錄新化人父喪哀毀母曾氏病革割股入藥奉之遂愈葬父築墳傷股母問至再得實母子相持而泣

王朝卿邵陽人嘉靖初以貢授訓導父失明棄官歸養傾貲訪醫既而父目復明撫按題旌祀鄉賢見舊通志

簡而廉邵陽人通五經舉孝行貢入太學任監利訓導朝夕思母遂謝官歸養著有孝經解卒祀鄉賢見舊通志

陳恭三楚文獻錄新化人幼孤為傭取其直以養母母喪既葬晝食其力夜廬於墓哭泣盡哀三年如一日

伍寶三楚文獻錄邵陽人少孤貧養母盡孝隆冬有憐其寒遺以綿者受之不服曰母年老非絮不煖吾猶可

耐母卒哀毀骨立得棺於鄉民伍蘭家以葬願傭三年償其直晝給役於伍氏夜廬於墓歲餘蘭嘉其孝勸令勿就役泣曰母骸藉恩不至暴露盟言若爽母終不瞑於地下傭三年然後去

潘一桂武岡人幼隨父官於黔母歿哀毀事繼母得其權心後遊粵西拾遺金於路待其人至還之旋與同舟一桂墜水其人赴水救之家貧訓子讀書勸鄉里敦睦人多感化 見舊通志

胡安壽 三楚文獻錄 邵陽人性至孝父病割股以進旋愈貧鬻爲人奴去家百里其弟走報母疾安壽剖胸割肝付弟以療母復愈知府陶珙躬驗新舊痕贖之以歸並優恤其家

謝朝關邵陽人性篤孝友樂善好施監司郡守旌其門 見舊通志

羅永高 三楚文獻錄 新化人性純樸耽讀經史父銓病篤永高竊嘗糞妹兒乃大驚詰其故曰嘗聞症熱者糞必苦可驗危否聞者歎美一日拾遺金訪其主還之卒年九十孫愈舉鄉試爲清白吏曾孫元孫貢太學復以孝義聞人謂永高遺慶遠云

楊達 三楚文獻錄 新化人早孤事母唐氏盡孝凡飲食必先進於母乃敢嘗定省之禮朝夕不廢母爲擇婚謝曰人子不孝多起於婦人辭弗娶母詰以無後達願婚

其二弟家無恒產其叔父與隙地耕藝其中又教童子習句讀以資奉養母疾篤貧不能延醫告天割股肉煮糜以進病良已母卒哀毀骨立既葬廬墓三年鄉人多感化焉

皇清蕭士煥武岡州人順治辛丑洞口水溢居民廬舍淪沒無算士煥母周年八十并其妻俱漂浮大波去士煥倉卒得一椽赴拯其母至石柱江始及岸距其家已二十里矣其妻亦得免人謂孝誠所感 見舊通志

岳州府


宋徐偉姓謹臨湘人事母至孝母死毀瘠至嘔血舉孝廉不就去之陸渾縣解落山中教授生徒依之以居者

三百餘家歲饑貧不舉子者偉資給之人感其惠所舉子皆以徐名偉有八子皆知名時號八龍

元劉錡元史列傳琦岳州臨湘人生二歲母劉氏陷於兵稍長思其母不置常嘆曰人生有母我獨無輒歔歔泣下及冠請於父往求其母數歲不得後求得於池州之貴池邈以歸養其後十五年而父歿又三年而母歿終喪猶蔬食有司上其事旌表其門曰孝義

明傅詵平江人親喪廬墓六年手種樹為林猶不忍去 見舊通志

徐瑛楚紀平江諸生早孤家貧奉母居學舍中就其廩給母歿既葬廬墓三年不忍去芝草產於墓前人以爲



篤孝所感成化乙巳郡守李鏡以聞詔旌其閭

湯玉廉平江人父病篤割乳肉煮粥以進遂愈其後裔
曰教饒於財而能散嘉靖甲申歲旱散粥賑饑宰臣以
尚義旌其門

程謨巴陵人事繼母以孝著萬曆戊子歲荒設粥濟饑
全活千餘人年八十二終

湯浙臨湘人行檢修飭由歲貢官淳化知縣事母至孝
母危疾日侍湯藥衣不解帶御史朱瑞登表其閭

唐世柱巴陵人少孤事母至孝撫臣舉孝童中萬曆甲
午鄉試授濟寧知州置先賢仲子祠田數頃以振興風
教秩滿士民立像祀之遷戶部員外郎奉差賞陝西二

邊以母高年致仕

楊一位臨湘人歲貢生生數月而孤事母許氏純孝母
卒廬墓盡哀性醇謹工古文詞任湘鄉學訓導遷江夏
教諭卒祀鄉賢 以上俱見舊通志

皇清張若齡臨湘人少隨母避獻賊亂絕食山谷間若齡
行乞奉母再罹吳逆猖獗挈家逃避母老艱於行夜
遇虎若齡以衣蔽母露坐達旦虎馴伏不爲害二子
俱登賢書人以爲孝感所致云

常德府

明柳汝霖武陵人年十歲父母俱抱病汝霖夜祝天剖
股雜他肉以進父卽愈母復思前肉汝霖創甚引刀不

能舉齧股肉進母食之復愈後於路拾遺金候失金者三日乃至封識如故其人感德以半酬之不受

胡順明桃源人總角時母病父遠客順明日夜侍湯藥私禱於神刲股肉以進母病遂痊夜倦臥床下母憐起而撫之見刃傷流血大哭隣里驚歎縣令列上提學得補諸生父母年俱八十餘卒

譚憲武陵人以孝稱親喪廬墓三年按臣學臣並獎其孝

羅尚賢武陵人性敦孝友讓產與其昆弟父懋憲病疽跪而吮之諸罹獻賊慘殺者捐貲殮而葬之凡數千人聚為大家焉以上俱見舊通志

皇清唐祿培武陵人生三歲而孤遭明季流寇邑里蕩析無業衣食而力學不倦尤敦篤孝友奉孀母譚左右就食一門孤寡藉以生全康熙壬子選貢丙子奉

旨旌門

辰州府

明侯以寧沅州人母病割股療之遂愈後母卒將窆雨不止以寧號泣籲天須臾晴霽有司表其門見舊通志

鄧顯芳姓譜辰州人正德七年鐘筭苗叛掠村寨衆皆逃避顯芳以母柩在堂固守勿去人怵以禍芳曰棄母而逃心實不忍生平讀書所學何事苗至使芳爲嚮導芳不從遂遇害支解於母柩前聞者憐之祀鄉賢

陳士偉沅陵人家貧夜讀書晝賣薪買鮮以事親嘉靖
戊午領鄉薦除寧海令以親老辭歸

李春輝沅陵人祖疾瀕危春輝割股療之得愈有司表
其門閭

陳尚義瀘溪人事親篤孝萬曆三十九年詔旌

尤可樂辰州衛人割股療親疾瘳有司旌獎以上見舊
通志

皇清龔承寵沅陵諸生母歿廬墓哀毀以終

胡彥沅州人醇篤孝謹明末流寇充斥值其父卒冒
難營葬賊至義之不忍害

龍霖沅州諸生流寇亂負二親逃岩谷間猶日求甘

旨奉養親歿居廬枕塊年八十終

李之棟沅州諸生母病卒哭踊幾絕水漿不入口父
喻之曰若不爲我地耶乃免進食承歡養志事庶母
如母族黨皆以孝稱

危階黔陽諸生歲饑負米百里外道遇虎祝曰若吾
母當生天佑我否者天絕我虎竟去母歿廬墓三年
劉星沅州人爲人傭作積貲以葬父嘗負母避寇山
中越險墜崖母子並全族親貧乏者卹顧無恡情雍
正七年 旌

李之蓮沅州人讀書篤於倫理恪共子職鄉里稱孝
者無間言雍正七年 旌

張世正沅州貢生性純孝父病劇禱於神願減已壽以益算父病遂愈人以為孝感所致嘗著家範十四條訓諭族人每教授生徒必先器識而後文藝尤好善樂施鄉里不能婚葬者助之邑有通衢阻河造舟以濟人無病涉雍正九年 旌

永順府

皇清朱定國保靖人幼失怙能孝養其母及母歿食粥盡哀

直隸澧州

元馬安石門人父喪負土成墳廬墓三年有司以聞詔旌其閭

邵茂質石門人其母性畏雷輒以身翼之歿後值雷震則張蓋以蔽母冢云

杜世壽慈利人母劉氏病篤割股煮粥以進遂愈詔旌其門

張杏孫慈利人少孤事母孝謹母歿負土為墳哀瘠盡禮鄉人稱為張孝子里有鹿泉歲旱泉亦竭張沐浴拜禱渟注如初子兌成進士 以上見舊通志

明丁源祖澧州人少孤貧事祖母遠母楊至孝天順乙卯歲饑源祖樵山漁澤其妻採薇蕨以資奉養世母薨早寡無子源祖迎與同宅孝養如母焉 見舊通志

皇清吳士升澧州人父嘗誤墜水蘭江中士升赴救俱獲

孝子

生全母病思梨覓無由得乃哭於神廟忽有貨者過
焉購歸奉母渴病以解年七十餘父母皆在愉色承
歡人比之老萊子云

張舜齡安鄉人諸生有文譽父預爲流寇所縛舜齡
往救賊以刃加頸不爲動求釋其父愈益哀切賊終
無意釋之乃悉毀其家贖父歸事繼母如所生色養
未嘗少衰二子根先明先同榜舉人明先成進士官
翰林檢討贈舜齡如其官祀鄉賢

直隸郴州

宋黃觀象明一統志興寧人秉性至孝居親喪盡哀躬
負土築墳廬墓七年有虎馴於墓側事聞詔旌之卒祀

鄉賢

明黃佐郴州人幼孤事母盡孝備耕以養母病思肉家
貧無所辦佐割股以食病卽愈母歿哀毀鄉人稱之

黃大年桂陽人早失怙事母李氏盡孝比喪勺水不入
口者累日哀毀骨立三年悲泣不已

曾用中桂陽人事父及繼母孝謹父母歿廬墓三年

黃潭永興諸生性至孝母歿廬墓三年令以潭孝行聞
例授儒官有德孝錄

李顯貴郴州人嘉靖癸未賊入其家執父及繼母去顯
貴率弟以追擒賊一人斬二人餘衆驚散父母得還有
司旌其門

王家珏興寧人領鄉薦以孝聞 以上見舊通志

皇清賀爲賢郴州人二歲失父比能言問其母兒父安在母泣曰汝孤兒安得見汝父便牽衣大哭母素羸多病奉養未嘗輒離左右母歿哀毀骨立廬墓三年胡鴻興寧人國子生事親能孝養一嚮之味必手自調和母夜思江魚走連溪口覓以歸其父常患左足腫潰鴻含藥吮之得愈

許掄科興寧人父哀少孤貧以授徒爲生掄科年十八值歲饑負米三百里外歸有偷容父極憐之母病晝夜侍側三月未嘗解衣寢臥圃中鉏藥草得金人謂孝養之報

盧大位桂陽人父性嚴大位先意承志委曲得其驩豫父卒哀毀事母却搔痲未嘗輒離寢所

楚明璣永興人歲貢生性純孝父母病篤醫師治皆無功明璣禱於神示有老人授藥之異人謂孝感雍

正八年 旌

朱明傑桂陽人事親能孝養輒以餘資卹貧乏雍正九年 旌

朱世新桂陽人明季負母避亂山谷奉養唯謹自採野蔬充腹兩弟早卒撫其弟之子女皆如已出雍正九年 旌

直隸靖州

朔廣通志

卷之六三

孝子

三

明石景順會同人事親克孝至老彌篤又嘗拾遺金還其主嘉靖間縣令王畚申表之

曹民靖州胥役一日忽辭歸養母歷四十餘年曲盡子道當事並旌之

湯克義通道人父病剖股搽療又嘗糞以辨病症當道旌之

唐文成會同人幼孤母龍氏督課爲諸生備極孝養母病寢不解帶縣令陳原道詳舉孝行以上見舊通志

皇清鄭熙齊靖州人九歲祖母爲王進才兵所執熙齊願以身代賊義而釋之又割股療父疾遂得愈

何際泰 梁繼祖俱通道人皆割股以療親疾以上

見舊通志

湖廣通志卷之六十三

湖廣通志卷之六十四

義士志

義民義僕附

士為四民之首義為四德之一士之所以為士者義而已矣曰思義與利相權者也曰取義與生相較者也身無化導之責而德及閭閻任無疆土之寄而乃心王室粵稽前史錫爵旌門彰彰在人耳目或輸金穀以佐軍國或捐軀命以全節操或里黨藉保障之功或累世著同居之美或拾遺而不受或破產以全人見利而思舍生而取非斯人之謂與我

皇上風勵海內既錫褒綸又崇明祀典至渥矣至於目不覩詩書之澤品不過僕隸之班名與士殊實乃無愧

舊乘所載歷歷可稽尤宜亟為表章以為好義徙義者勸

武昌府

〔宋〕陳倬字思立明一統志咸寧人有田五千畝兄田僅千畝倬願合產而居或有誚其愚者倬曰人各私其財願為樂耳兄弟聚首朝夕言笑此吾至樂也飽煖之外多田何為其後兄子康民登元祐進士官至大中大夫倬祀鄉賢

李宗儀江夏人與從弟宗儒四世同居相友愛好學篤行築書院建祠以祀先聖給田以贍來學其子彥章有父風汴京失守程吏部干鞅勤王發廩佐軍予以官不

受舊通志

元廖均用蒲圻人元末避亂南山散財饗士鄉民賴以全庇躬耕儲穀至二十萬石值歲大旱盡發所蓄以活饑民崇咸嘉蒲四邑取貸不責其償人稱長者舊通志

〔明〕李興賢字廷賓蒲圻人弘治甲子鄉舉父仲高嘗出銀穀各萬以賑荒興賢事母謹貲富族大誓不分析每飲食集一堂長少男女各為席親戚鄉里有婚葬不能舉者助之正德中大旱以舟載穀分濟鄉人舊通志

李玘李瑞蒲圻人兄弟敦孝義創立家規廣置義田子孫七世同居成化中旌

方宸方案嘉魚人嘗輸粟賑饑授冠帶正德己巳歲

荒劇盜賀璋等聚黨橫行宸應募領衆大破之餘黨復
亂追戰遇伏墜馬死弟案救兇力鬪亦死事聞贈宸檢
校

朱恩 楊鏜俱江夏人楚藩引禮生嘉靖二十四年楚
世子英耀弒其父愍王以暴薨訃諸司先是英耀閉恩
鏜於別館二人聞變以曳燈長繩繫腰自內城縋高觀
山而下恩足折鏜扶之告變巡撫以狀聞檻英耀至京
師伏誅初恩鏜告變時倉皇過宮門叩銅環大言曰宮
中人國主爲世子弒矣盍善藏少子內臣匿少子英燦
於溝中獲免嗣立是爲恭王

朱蘊鏡字希周楚藩宗室博學工文力辭中尉祿會懷
宗詔宗室有文武才者許照品俸換職直指汪特疏薦
之後城陷於流寇不屈死

朱華趙字德心楚藩宗室明末亂嘗寢處一劍曰將來
必與此終始又於屋後掘一深池及鄂城破驅妻子入
池中率家丁巷戰殺流賊三十餘人賊大至伏劍而死
明睿字作聖江夏廩生力學甘貧名節自勵獻賊薄城
趣造木主題明苦節明生之位語人曰吾讀書明理一
且引筆寫順民二字不如死城破妻陳氏先赴井睿繼
之子女皆相繼入乃至二亂者井已填窆轉而入皆死
焉數月淘井得九尸里人稱之曰明井 以上舊通志
李成名字次峯江夏人隱居教授獻賊破會城聞其名

強之從行成名抗節不屈賊縛之罵不絕口斷手齧身而死邑志

劉承漢字心五武昌縣庠生嘗以忠蓋自許癸未獻賊陷武昌執之令跪厲聲叱曰鼠輩我豈拜汝哉賊怒截其舌噉血唾賊面扼吭而死

賀昌明字宸極武昌縣諸生闖賊破京師痛愍帝以身殉國乃傾家貲爲設祭遠近聞而赴奠者萬數昌明披麻執杖如人子禮遂發狂疾終其身

陳瑞字五玉咸寧諸生明末江水竭嘗作涸江歎以憂時流販內訌瑞曰吾有從彭咸之故居而已二女孫未字晨起扁舟載之紫潭令先投水徐浩歌一絕自溺焉

卓立水中數日不仆

潘銑字蕭池興國人敦樸勤敏捐產與兄弟共之作孝弟忠信禮義廉耻八訓八戒於家祠以垂示子孫以上

舊通志

皇清宋維舉字四隅蒲圻人天性孝友與侄時魁捐義田三百餘畝每歲所入自輸公及烝嘗外悉贍族人尤敦禮義以顏氏家訓課其家

程九伯通山人順治二年五月闖賊爲

王師所躡敗潰至邑九伯率衆殺之於小源口獻功轅門總制羅劄委德安府經歷

張拱璧字正陽蒲圻人幼孤事母至孝順治壬辰邑

義士

大早次年穀價湧貴壁積穀千餘石盡設糜粥哺饑
全活甚衆子瑾光順治己亥進士以上舊通志

曾孔一字君唯江夏人性至孝好善樂施父孝文山
陽令早卒母雷氏病劇割股救之嘗質屋助友人葬
資廣搜枯骨置義塚於東關外年九十一卒子年豐
壬子武舉孫景範歲貢生以行優聞

李文郁字友梅大冶庠生父雲從以義槩聞郁爲人
慷慨正直好義輕財有父風癸酉歲歉輸穀五百餘
石以賑邑人賴之子之岳蘄水訓導孫祿昌明經祚
昱優生

張應聘字象賢江夏人性慷慨歲饑戚里賴以舉火

者數十家而身啜糜粥自如里中張某幼孤豪奪其
產力庇之卒令復業嘗夜遇盜聞其名相與驚顧護
之歸子以修孝友敦篤樂善好施館脩所餘悉以給
里黨之貧乏孫若衡康熙丙戌進士任睢州知州

漢陽府

宋張昌中一名昌宗明一統志漢陽人治家以義歷世
不分馮京贈詩曰一水滌泗繞沌村子房苗裔此間存
同居八世三千口可惜君恩未表門嘉定間郡守孫杓
嘉其義捐俸代之納稅事聞表曰義門

明程昂其先英山人元季六世祖希哲避亂遷孝感之
弘樂鄉善治家遵禮法戒子孫勿析箸勿私財事必稟

家長然後行世承其訓至昂從弟昇爲徐州吏目歸出俸金置祭田二百畝弘治十六年以七世同居表其閭

舊通志

楊廷松字汝節孝感人父沔饒於財析箸時兄弟各擇腴產松欣然受其瘠者性好客郵災所居成市今名楊家店歲饑出粟貸人或不能償焚其券更置義倉義學義館義橋義塚義井遠近便之翰林王廷陳御史毛鳳詔皆有六義記茅坤爲之傳

王瑚字汝器漢陽人少讀書周困扶危萬曆中兩次大水前後捐穀二千餘石備賑拚齒幣無算三請賓鄉飲皆婉却之壽八十終贈奉直大夫子尚賓明經任麻城諭家賓另傳國賓庠生孫士謙丁酉舉人

傅伊字夢弼孝感諸生與楊忠烈連友善連被逮裹糧送百里外又爲募千金以償誣賊瘞_以姪嫁孤女周急好義屢賓鄉飲以上舊通志

劉申錫字爾受孝感人天啟甲子舉人懷宗末賊亂錫因二郟畷故宅立砦糾集鄉勇自保砦破被執磔於鄧州之南門罵賊而死事聞贈知州廕其子淦邑志

王立益黃陂人事繼母以孝聞自置田產槩分諸姪族人困糧役鬻田八十畝代償嘗獲偷兒與之酒食勸以改行偷兒痛哭捨地曰恨早不聞仁人之言自今不復爾矣學行尤高士林避之舊通志

義士

傳可知黃陂諸生嘗道拾遺金待其人還之後為流賊所執令餉馬厲聲曰我為衣冠丈夫八十年肯為賊役乎賊怒殺之

譚德化字君明黃陂人性孝友父病篤嘗糞為驗兄受誣見繫毅然以身代力控得免戚屬病疫躬進藥餌療治友人遊蜀三年不歸代辦薪水給其妻子道遇凍者垂斃親負之還其家後為流賊所執舉刃脅之罵曰死賊乃敢殺義士遂遇害祀鄉賢

陳致中字正吾黃陂人撫幼弟成名不分爨又以田宅給孤甥為子聘劉氏女女聾瞶痿致中曰棄疾毀盟傷信不仁何以示子孫迨歸待若已女流賊亂父八旬

見執致中翼父傷左股賊投刃曰義士也扶去之以傳

舊通志

夏珩字聲錫孝感人年十四為名諸生好施與拯人窮困懷宗丁丑賊逼城鄉人入保多露處巷術婦人免未彌月者例不得寄人門宇咸欲棄所乳圖自全珩輒憐而庇之資以糜粥或謂是將不利主人珩曰咎一人以活衆人不亦可乎竟亦無他其存卹多類此子祿元以諸生高隱終邑志

蕭鳴霄漢川人懷宗己卯武鄉試中丞宋一鶴撫楚駐軍安陸辟為參軍隸卒僅千人賊至霄選精銳掘地夜出潛伏橋下橫衝擊之斬獲數百級賊乃解以功授辰

州參將弗就一日家居有水賊數千夜至漢川圍城數
重霄以數十騎迎賊力戰殺傷數百餘悉潰溺邑人德
之

喻甲孝感人懷宗丁丑九月流賊十餘萬破邑北關守
兵皆驚散甲奮激大呼趨月城上飛巨石擊賊失足墜
城死賊遂退邑人勒石紀其功

以上舊通志

皇清夏元瑞字掄伯孝感人好施樂善明末差徭重有鬻
產以濟者遺其金瑞拾得俟其人還之又有鬻幼子
者僅得三金遺失哭甚哀瑞立償之其人曰非我原
物瑞曰適用之矣實未拾也贖流賊所掠婦女數十
人各賫衣糧送還嘗在湖南賑饑人及後歲荒以舟

赴湖南運米歸遇盜掠去明日盜廉知姓名如數來
還稱謝去又爲盜所得渠魁坐山寨問方肆拷問其
妻忽號泣出拜則前所贖掠人也居鄉煮粥活饑民
無算家遂貧窶

饒詒字燕翼孝感人性醇樸好義樂施明季流寇破
高台砦野多暴骨順治乙酉詒倡義同兄若谷輩捐
貲置義塚躬拾遺骨瘞之人稱其德

以上邑志

黃州府

元吳應澍黃岡人重誼樂施能周人急嘗置橋井數十
處設旅人午炊四十餘年號西山隱士祀鄉賢

舊通志

嚴仲祥黃梅人性孝友有子十一人九世同居不蓄私

財天曆中旌為義門

李清七 李清八 蘄水人居黎山以義烈名會妖人徐壽輝陷蘄水人多脅從知清七才求得為已用清七與弟清八以為恥賊怒大索獲之兄弟歷陳大義堅抗不屈而死今薛湖東立廟河中祀焉

張大九 廣濟人幼習左氏春秋元末見天下兵起遂隱陳友諒強致欲官之不可友諒怒剝其兩足而去 以上舊通志

明王燾明一統志蘄水人七世同居少長三百餘口庭無間言有司以聞詔表其門曰孝義祀鄉賢

陳遵德 蘄水人正統六年陝西饑荒捐穀五百石往賑

中途為難民所奪歸復載六百石以往奉旨旌為義士勞以羊酒給復三年 舊通志

張正福 張正顯 張友舜 張友珠 羅田人正德六年流寇趙風子掠黃郡守胡定募勇士福與弟正顯姪友舜友珠應令直入賊壘遂殺賊首八人賊披靡而福等亦戰死太守為文祭之

吳璋 黃岡人倜儻負氣節初為掾時大禮議起諸臣忤旨譴謫纍纍璋曰死忠孝者分也我其為陳東歐陽澈乎遂徒步詣闕上書申救楊廷和等復力持諸臣前議詞甚激上怒下錦衣獄杖八十數日太廟災上問湖廣前日上疏小吏何在守者疑上不能容遂壓死以聞上

義士

九

日惜哉朕將有以用之也

張本森字木齊廣濟人讀書食貧遊學齊魯間授徒三年積館穀數十金值歲饑悉捐以賑貧民赤手歸與婦相向怡如也後子孫鼎盛

胡明睿 詳鄉賢志

王相字良弼黃岡庠生置義田贍族歲大饑為粥食人於路邑東有河相一日見婦人渡為少年所侮乃以騎濟之因捐貲造橋名王相橋

曹良輔字大忠黃岡人居崎山之陽釣青溪因自號清溪居士以妻奩置產分諸兄弟或問之曰異姓物分同氣不亦可乎

劉文元黃岡人有中表王某臨終以子為託年甫十二元許諾每課不率則扑之又不得則捧某木主跪生而泣諭之曰汝父命歲費三十金元簿記日入分孰半日則減半一二晷則減三之一吾不忍欺而父也萬曆壬午某子舉於鄉偶接元衣履未肅怒叱跪之堂下踰時乃解某子後成進士

秦鳳儀字應泰黃安人存心濟物有同學家病疫人莫敢近儀獨旦夕往視躬殯其母居恒率子弟以孝友化宗族以雍睦有古人風

饒嘉班字季野廣濟庠生好周人之急施棺至猝不能備鋸庭大枋以益之晚讓宅於兩兄自處數椽淡如也

子軫中登進士以上舊通志

易道暹明史稿字曦侯黃岡諸生少好學尚氣節藏書最富與艾南英為文字交懷宗乙亥流賊亂子為瑚奉母走青峯巖暹令蒼頭擔書攜幼子為璉他遁與賊遇陷以富貴暹厲聲叱賊賊怒欲兵之為璉請代父子俱遇害

程為常 徐玉蘭 蔡巨人 胡方壺 徐用極俱斬

水武舉明末募督鄉兵禦流寇戰死縣令龔鼎孳立五義祠祀之舊通志

於斯昌字文言黃岡人懷宗己卯鄉舉癸未獻賊索之急敝衣草帽亡走死

馮雲路字漸卿一字畏庵黃岡諸生年三十棄舉子居鄂城從賀文忠講學著用書百餘卷直指汪承詔疏薦並采其書進覽流寇逼楚以書報賀云在內以寧湖為止水在外以江漢為汨羅寧湖路所談經處也城且陷遂懷所著藏易投寧湖以死

熊甯字渭公一字立齋黃岡諸生與馮雲路同寓鄂城破前一日別馮云大丈夫當從節義中尋實地某明日於某樹下書熊渭公死所幸為語母弟已而流賊至甯端坐樹下不動怵以刃甯怒罵奮身投荷池死著有性理格言春秋主左十三經注疏評畧大易參立齋古今文及圖書懸象諸書

汪陞延一名三奇字確菴黃岡諸生從馮雲路遊嘗註
五經成癸未會城被死之

史子見黃岡庠生明末癸未里有毛主席者為獻賊偽
總兵至新家冲招兵子見憤甚殺主伯獻忠怒下令三
日不獲子見屠其鄉子見挺身往賊碎磔之筋肉都盡
骨猶屹立不僵乃鎖其項於彰孝坊夜分鎖脫骨走臨
湖寺次日賊大索獲之復刃其首今新家冲人以為神
家祠之以上舊通志

曹大震字子且黃岡諸生孝子大聲弟也獻賊之亂震
為所執罵賊不屈而死孫一嵩選貢邑志

戴瑾字可懷黃岡人聚義勇要獻賊於馬鞍山之隘賊

欲生致瑾瑾退入庄樓不下賊積薪焚之子孫暨勇士
三百七十餘人俱燼

曹上謨 王子見 余季貞黃岡人俱捍流賊守城城
破被磔

王邦衡 王鯉羅田人衡與其子諸生鯉同為流寇所
執不屈死以上舊通志

張開熙字功人廣濟庠生素以忠孝自砥礪明季流賊
亂開熙罵賊不屈觸石以死邑志

孫光宸廣濟庠生流寇盤踞其鄉執宸為鄉導宸計免
鄉人於難給之曰某地有金帛可掠也導賊出境及至
毫無蓋藏賊怒殺宸鄉人德之葬而祠焉

舒益生字民裕廣濟人幼尚奇節明末流寇抵黃梅益生率死士四人偵於石壠賊驚疑未卽至乃疾馳歸呼邑人遠遁寇至居民數萬以預避得不死張獻忠遣人持衣帛召益生手刃召者逃之山谷乏食采野蔬自給凡三閱月後以高隱卒子逢吉峻吉遂吉俱有學行以
上舊通志

皇清張百程黃安人字日闡鵬翔子爲諸生以文章氣誼見重於時明季流寇亂結堡保集鄉里遂精騎射丙子應試郢中寇逼城射殺緋衣白馬賊遣健僕濟阻水婦女數百人郢人德之癸未里人變起帥堡衆討平之活其脇從者甚衆以諸生終
舊通志

鄧一隆黃岡人家世孝友隆尤恭謹勤儉著家規十六條家訓四十二章歲二次集男女序班會講又立功過簿以寓勸懲子弟誦讀至年二十度稍能文乃令終業否卽改習農商婦女以黎明集內室治女工財物悉貯公所推一人掌其出入服食無私年老及有疾者別優養之自隆高祖文書至曾孫丕槐輩同居八世內外和睦無間言雍正元年 旌
王象虞黃岡人性伉直好義敢爲有智畧順治初土寇起東山清軍府選爲四十八砦練長象虞提義勇千餘人所向克捷時有紙砦鐵人練長王君之謠子友柏化龍俱孱生以學行稱

安陸府

明魏襄字子臣天門諸生父綸伯父經弟稟孝友敦睦五世同居聚族數百口無間言僉憲柯喬扁其門稟領鄉薦

譚祐字湘涯天門人家貧館於當陽歲暮歸存束脩數金途中遇胥吏械老夫與妻泣別祐問故知以寃罪當贖將鬻其妻遂盡捐金與之抵家度歲無以為炊妻甘氏出績易米後孫元春元方元禮曾孫篆徵科第不絕以上舊通志

王幹鍾祥諸生闖賊寇郢城陷幹一門男女七口繫手同赴水死郡志

朱日薦沔陽諸生流賊陷沔率鄉兵拒賊斬首數十被執罵不絕口支解死

李哲京山諸生為流賊所獲大罵不屈而死

彭修翮 彭大翮 彭龍躍俱天門庠生懷宗壬午流賊破郢城大翮著平賊權畧五十二策上執政不果委任憤歸青山約諸生劉振孫等倡義起兵賊襲擒之大翮與兄修翮姪龍躍輩擊殺數賊不勝同赴河死京山御史鄭友炫為作義烈傳

劉振孫字似麟天門庠生生平磊落慷慨闖賊陷郢城與青山義士彭大翮等潛圖恢復謀洩為賊所獲臨刃猶連呼死賊不絕聲

黃允金荆門諸生流賊犯州城命妻女投井中與二子
挺身殺賊力屈死之

胡宗珂荆門人流賊陷州城珂以死守殺賊城陷罵賊
死

王維藩字現南荆門庠生壬午寇亂藩與妻朱氏并二
女皆被掠妻投水死藩手刃二女因自刎以上舊通志

皇清張連璧字仲維潛江人庠生孝友端方親喪未葬適

水漲以身伴棺月餘泣血不輟喜施予年荒捐穀賑
饑活人無算邑令題額曰粉榆仰澤卒年九十三子

承寵歲貢篤行工文著作甚富嘗捐金助婚尤為克

體先志

德安府

〔晉〕王偃〔晉書張昌傳〕偃江夏舊姓江安令值義陽蠻賊

張昌橫熾江夏士庶莫不從之惟偃與秀才呂蕤不從

昌以三公位徵之偃蕤密將宗室北奔汝南投豫州刺

史劉喬鄉人期思令李權常安令吳鳳孝廉吳暢糾合

善士得五百餘家追隨偃等不豫妖逆按晉江夏郡在

今德安府安陸縣地

〔明〕陳才傑應山人性孝友正德七年劉六等寇應山傑

領民兵赴戰死之舊通志

萬鵬字子仲〔明一統志〕安陸縣人性孝友介直工文詞

隱居授徒從遊者衆居喪一遵家禮善醫每製方藥濟

人所著有史說藏於家

雷鼓英字四維安陸縣人懷宗庚午舉人癸未流賊據郡城欲官之英從間道走武昌又值獻賊之變闖家赴水死

袁敬觀字君白雲夢人流寇據郡城觀糾族衆相保聚恒以短劍自隨賊檄至縣署試以文觀叱曰誰與談文吾將加爾兵賊怒曰書生敢稱亂觀曰亂臣賊子人人得而誅之賊大怒磔殺之

柳宗旦字鼎極雲夢庠生教授里塾以俸資贍諸季歲饑設粥賑流移闖寇陷城誘以官宗旦大罵賊怒斧其首而死妻劉氏亦以節終

朱善昌字禱之雲夢庠生懷宗末被流賊獲罵不絕聲遂遇害

李聯元雲夢人居曲水湖離城三里許流賊夜襲城道經其地元恐城中不知率族衆大呼聲聞城內賊憾甚擒殺之

左璞字克修雲夢人流賊陷城執之使荷所掠鷄豚璞怒唾賊面傷以刃步至樹下跌坐而卒越數日往殮尚端坐如生

施爾奇字簡之雲夢諸生意氣豪爽流寇犯其里仗挺拒之被害其妻劉氏與女同往救俱死三屍駢集里人哀之

柳列奎字文仲雲夢諸生素有膽氣流賊至仗槊前鬪力竭而死

張用晦雲夢諸生流賊陷城白雲若義兵恢復晦起兵應之戰敗不屈死以上舊通志

荆州府

〔南北朝〕王元紹〔楚紀〕江陵人弟孝英子敏咸相友愛凡有珍味必闔族聚嘗未嘗有異侯景亂元紹被執二弟爭抱持皆遇害

〔宋〕張榮貴遠安人家團山九世同居常積穀數千餘石以贍族人及鄉里之賢而貧者終身不求聞達號團山居士舊通志

〔元〕向遜〔明一統志〕江陵人自宋末及元九世同居無間言人稱義門至元十九年僉憲魏奉訓奏聞旌表

〔明〕向致和字道達宜都人端潔鯁直不求仕進嘗捐貲修橋周貧景泰間歲饑貸鄉民穀三百餘石盡焚其券壽九十有五舊通志

蘓昭〔明一統志〕宜都人爲南平令致仕一日江濱遇一孤子守骸而泣昭問其由曰父將往巴東歿於此死無所依昭遂出貲殮之助還成化間有杜姓者五人饑甚逼食於人執於官誣以盜罪昭上書當道得伸

趙思綱宜都人自高祖德隆五世同居至綱不替先訓弘治七年知州陳宣復奏請旌之舊通志

王宗義明一統志石首庠生自祖槐至宗義五世同居長幼二百餘口藹然雍睦巡按戴縉以聞詔表其門旌後合食又二世焉

易世鳳監利人嘉靖三十九年荊州大饑輸穀賑濟又出銀二百兩修文廟有司請於朝詔給七品散官里中士有貧窘者爲置宅供膳晉通志

楊訥字敏夫江陵諸生慷慨激烈有富媚子劉欽若補邑庠訥力攻之反被誣闔郡諸生白寃狀得廩給如故後以例貢司江浦訓有清節


陳大可江陵恩貢性孝友精易學從遊者甚衆父卒盡以其產贖諸弟敝袍蔬食終身不厭

王圖南字北溟江陵人懷宗壬午流賊至圖南避亂晁湖爲賊所獲不屈死

朱九臯朱九嶷臯字似鶴江陵庠生癸未春隨父避流賊羊角洲賊至驅妻女婢婦等三十七人同赴水死臯與弟九嶷亡走公安謀攻賊賊怒急攻城臯疑悉被執支解之

謝幼安字公嗣江陵人癸未秋流賊至龍灣市幼安貧不能具舟楫遂爲所獲大罵不屈截其舌含血喫賊面妻與子俱遇害

楊一登枝江人家百里洲爲團練長明末流賊艘數百至流店焚戮最慘登奮勇率衆大破之斬獲甚衆洲民



得全後闖賊兵數萬至登率衆禦之連戰三勝及賊益
至鏖戰父子俱歿於陣以上舊通志

袁喬年字天目公安人闖賊破荊州邑西村土賊勾闖
過江喬年與諸生王韶之蕭煜都牟光世等督鄉兵襲
破之闖謀遂沮會澧州陷血戰被殺族子貽則等俱死
華容孫公毅爲詩弔之

田朝儲字藍田公安人拒闖賊於馬長港挺身奮擊殲
賊數人力屈爲賊所殺

王夢齡字子修石首廩生其先七世同居夢齡遵祖訓
和以睦族明末獻賊掠荆脅諸名士授偽職夢齡以死
抗不爲屈歲疫施棺掩骼以千數好引誘後進鄉人稱

之以上邑志

皇清熊必奎字五聚石首人五世祖亮自江右任荊州學

博遂卜築石壇居焉奎幼穎異研心濂洛關閩之學

有聲諸生間慷慨負氣誼值歲饑盡售其田廬糴米

散給窮乏全活甚衆家坐是因教授生徒自給餘則

公之族黨通邑賢之子開楚已未進士舊通志

曾曰唯字康生明探花可前孫性孝友兩居親喪皆

廬墓中康熙己酉鄉試吳逆犯境強迫之憤罵而死

妻羅氏亦以身殉子也曾廩生績學工文孫憲椿邑

庠生以優行聞

劉鴻慶字子遵石首人順治丁酉舉人母鄒氏明末

卒於亂離慶旻夕號慟因著哀哀篇以自傷甲寅吳
逆犯順知其居鄉望重誘以官慶拒不從強迫之遂
棄家遁去子宗亢宗誥徧求不得怏怏以卒

嚴首正字國治江陵人性伉直言動不苟嘗捐廩賑
饑施棺掩骨鄉里德之孫克熾雍正甲辰舉人克明
庚戌武進士

曾昱儒字東萊石首人少孤事母以孝聞姊適劉姓
家貧蚤寡而無子昱儒迎養以成其節性剛直不畏
強禦而矜貧恤困常如不及孤客落魄其鄉者輒捐
貲遣歸人多義之

侯諫臣字資若公安人少失恃育於祖母李李病親
嘗湯藥衣不解帶者累月及卒哀毀踰禮父鍾愛異
母弟諫臣曲體其志悉以遺產授之族子某少孤有
利其產者力庇之且爲完娶令復業歲疫比閭姻戚
闔室傳染至親皆避去諫臣躬饋粥調藥餌以保全
之遇後進諄諄勉以孝友子孫遵其訓至今三世同
居不忍析箸云

襄陽府

唐張巨源襄陽人五世同居太宗詔旌其閭巨源嘗習
刑名書賜明經及第科

劉潭芳 常元治襄陽人芳五世同居治九世同居俱
旌表

明常存畏穀城人天啟辛酉舉人公車遇賊罵不絕口而死以上舊通志

皇清李藻棗陽人以守城死難見列女志

鄖陽府

明郭可久保康歲貢生四世同居家長授事卑幼聽命深得古人大宗之法孝友恭遜庭無間言鄉里稱為義門云

寇士元上津庠生倜儻有異才懷宗時流賊蠡起元散家產募戰士屢出奇破賊賊不敢逼城知縣蔣宗縉詳加守備管營將事後以血戰死賊義而殮之

劉泗源鄖縣庠生明末路馮二賊圍鄖城中食盡將潰

泗源縋城入賊營為謀以間之賊兩營互相猜疑天明

遁去

皇清謝廷賓保康諸生有知畧郝賊盤踞房竹間往往以輕騎掠野賓糾合鄉里保守山寨間出奇兵襲賊賊不敢縱人賴以安以上舊通志

直隸歸州

元田韋臯巴東人仕至金紫光祿大夫累世同居詔旌為義門今其所居曰義門村舊通志

明高維遠興山庠生明末闖賊之亂縣設偽官殺戮無忌維遠倡義執偽官戮之邑賴以安

譚正賓巴東人慷慨好義為里中所重懷宗末容美土

司每為邑患正賓集里人共相防禦會土蠻為浮橋於清江渡將半正賓率眾奮擊土蠻敗走忽水漲橋沒溺死千餘人容美衙憾密使人刺殺之土蠻遂橫以上邑志皇清何學禮長陽貢生避賊厚浪沱順治四年率先歸誠為土司所伺執之罵不絕口而死舊通志

義民附

武昌府

元馮三元史丑間傳三為湖廣省公使素不知書寇陷湖廣皂隸輩悉起為盜拉三以從三辭曰賊名惡我等豈可為眾怒將殺之三遂唾罵賊乃縛諸十字木昇之行而刳其肉三益罵不止抵江上賊斷其喉去妻亦投

江死

明周瓚 方良 羅詒謙 饒世祿俱武昌縣人正統間各輸米一千石賑饑賜諭嘉獎建尚義坊旌之舊通志

張伯還大冶人正統五年饑出穀千二百石勅獎資羊酒立坊

胡大諒 盧欽 羅敬宗 李原俱通城人正統七年輸米一千石備賑勅賜冠帶旌為義民

徐貴美興國人出穀千三百石賑饑
盧萬頃 盧萬紀 胡琥 葛雲昶 李實俱通城人

成化三年各輸穀五百石備賑給冠帶

鄭守梅通城人萬曆二十二年因平倭輸穀一千石奉旨建坊


杜漸通城人萬曆二十八年輸穀五百石備賑給冠帶李德智字太痴江夏人生平薄名利一日有類丐者言自銅鼓衛解官銀六十金來將納諸都司舟覆文移墮水今歸請之聞公厚德願暫置公所俟四十日復來其人去死於路衛勘官錢逮其家併株連告喪者智聞持原銀詣都司納焉移文往勘縣令大驚立釋諸囚壽八十九歲卒

郭儀江夏人生兩月而母李氏卒父再娶李氏生六子獨鍾愛儀儀奉母以孝聞嘗捕魚湖中拾遺金一釜以足掩其坎私祝曰如為儀財勿以不義至當從生理中得之平居蓄一木椹里人有鬪輒撲其不義者人敬畏之以上舊通志

漢陽府

〔明〕嚴友諒孝感人輸穀千石賑饑正統六年旌
戴紹葵 黃剛 劉仲能俱孝感人各輸穀千石賑饑
景泰二年旌 以上舊通志

李聰 彭思明 湯雲雷 黎伯讓 劉仲剛 周永
鎮 楊本澄 劉思恭 陳聰 嚴經 湯盤 徐廣帶
馮芮 王琳 向浩 戴瑄 戴珣 戴珪 游必
華孝感人俱輸穀賑饑成化時給冠帶



林羅材字徵卿黃陂人嘗至湖口遇金珠客暴疾授以
笥而死殮畢訪其家還之後兩遇大盜覺前商於夢中
呼醒預避得免學憲王爾祿錄其事入陰隲編中 舊通志

萬祿 劉經孝感人俱孝友萬曆間歲饑活濟窮民有
司表異之 邑志

余文字懷舉孝感人慷慨好施每歲祲輒出粟活饑民
有鄉人溺其婦而逃漁人網得之棄諸道文惻然施糶
殮之婦父母知其女也疑文殮有故訴於官邑令王驥
訊得狀高其義禮為鄉賓旌以棹模 舊通志

黃州府

宋董助教黃岡人性仁慈篤於信義見貧乏輒捐貲賑
恤大觀間歲大旱嘗為飯飼饑又設資食給小兒多所
全活以壽終

明劉文輝 劉文煥廣濟人洪武初兄弟同解南糧愆
期法當死輝以長請坐煥曰兄子幼伏斧鑕則子孤無
託某宜死頓首流血當事以其詞上皆赦之則煥已死
矣太祖特書義民以旌

藍懋忠廣濟人正統四年出粟一千五百石賑饑勅旌
其門籠以冠帶羊酒
董經綸 陶以諒黃岡人好施與正統間歲祲各輸粟
數千石賑濟有司以聞賜勅及羊酒復其家三年並旌

其廬

孫子華黃岡人正統間值歲祲轉粟近萬石賑濟黃麻
蘄水三縣饑民有司御史臺以聞詔賜義民尚書

徐朝仕蘄水人正統間出千金穀千二百石助賑賜勅
並御製詩

石銓 陶文達 黃仲懋黃梅人正統間各出穀數千
石賑饑勅諭勞以羊酒建坊旌為義民免本戶雜差三

年

張士美黃梅人正統間罄家濟旱事聞給冠帶

蔡時蘄水人成化時出粟五百石賑濟授承仕郎

藍瓏懋忠從子成化時為闔邑代輸春租

程孔良 游校 毛思寧 鄭德廣 徐伯安 梅新

桂希堂俱廣濟人成化間輸穀賑饑

彭幅廣濟人弘治二年出穀賑饑事聞旌以冠帶

程友悌 劉禹清 戴子儉 徐萬貴 程紹宗 王

應中 李正芳 劉璜 饒仲魁 呂用賢俱廣濟人

弘治間輸粟賑饑

張恩黃梅人兄光病疽醫言人吮之可活兄曰汝嫂亡
誰為吮者恩曰嫂猶人合耳吾天合忍坐視乎含水啜

之再四而愈

徐萬隆廣濟人有黃梅里役解餉數百金投宿因醉遺
於厠內隆拾歸遲二日役號哭來求隆還之

王友立廣濟人嘗得橐金於舊河口求亡者不得以告於官則某里役領解之三百金也令義而旌之

藍孟文廣濟人萬曆戊申水災賑穀六百石又為本族

代輸秋糧

陳叔牧廣濟人萬曆間代闢族輸租千石 以上舊通志

安陸府

明黃仁還潛江人家不甚豐喜施貧死無棺者每代為營厝癸未寇亂離家十餘里遇流賊刃之頸將斷昏沉中若見醫者為正其首敷以藥且有數人掖之行家人避賊歸見其臥地上扶入室調治月餘而愈云前所見者皆施棺之人也其孫金鑲中辛丑進士 舊通志

德安府

明劉希堯安陸縣人年十五而孤弟希舜甫及週希堯躬耕養母撫弱弟友愛終身又從姪文煥少孤收養教訓如己子時人比之張公藝云

張正瑞 張奇瑞安陸縣人兄弟相友愛同居不析產兄主家政弟為郡掾吏經營於外錢帛一無所私自成童至衰耄六十年無間言郡守旌之 以上舊通志

荊州府

明程必達石首人永樂癸卯大旱饑殍相望捐穀一萬八千石賑活邑人次歲大稔蒙賑者來償弗受復捐材木為倉以備後賑名曰義倉楊文定溥記之 舊通志

毛貴公安人讀書知大義宣德間山東饑輸粟千二百石以賑勅建坊旌曰義民豎立大堰山

邑志

林守成楚紀公安人成化初麻寮商人以漆一器寄守

成而去至弘治中商始來適守成遠出商告之官守成

歸致漆縣庭封識如故啟視漆乾結惟中一滴濡耳令

嗟嘆良久杖其商錫守成肉米以旌其義

戴其仁松滋人併牴養親兄弟同居內外無間言時父

年九十有七仁七十有三弟義七十禮六十七父歿弟

者千餘人

鄧琮江陵人精於醫求濟者不責報一日偶於途拾遺

金五十餘兩以帑招之及夫婦二人號泣至乃官物也

選之以上舊通志

張誠明一統志荊州衛人性質樸好施與能急人之難

歲大祲道殣相望出貲周賑多所全活且為瘞其暴露

者有軍人犯罪當贖將鬻男以償誠代出金亦不責報

後泛舟公安遇大風溺死甚眾誠獨免人咸異之

馬良公安人正德四年山東饑時詔天下輸粟得補爵

良輸粟三千石不受賜職奉詔勞以羊酒勅書一軸特

旌馬氏善良之門後孫芝龍騾俱登進士應烜舉人

邑志

周元自臨江徙家江陵居積致富而好行其德嘉靖三

十九年黃灘隄潰出粟以賑貧民又修治橋路施藥餌

施棺及地歲費千金里中咸多其義

劉漢夷陵人十歲失父母居喪如成人及長拮据治生有羨卽以施貧其姑早寡無子迎養終身有鬻子以償

官逋者父子不忍割漢代償之其善行多類此

王良策夷陵人折節敦行事親至孝雅喜施予出貸里閭中或貧不能償卽焚券鄰有侵宅地者置不校鄉人稱貧行君子

劉宗釜字大鼎宜都人居家孝友秉心公直鄉人有不平輒往質之歲荒施粟活數千人

以上舊通志

皇清李繼昌字公直江陵人嘗捐貲賑饑掩骼完婚娶周濟獄囚積四十餘年不懈妻朱氏事舅姑以孝聞

吳逆變後道殣相望氏煮糜以給全活者數千人時

酷暑周旋釜鬻間湯火薰灼兩乳潰爛聞者驚嘆稱

為義門昌年八十二卒

襄陽府

南北朝韓係伯南史列傳襄陽人事父母謹孝鄰居種

桑樹於界上為誌伯以桑枝蔭妨他地遷界上開數尺

鄰畔隨復侵之伯輒更改種久之鄰人慙愧還所侵地

躬往謝之齊建元三年蠲表門閭

明徐恬穀城人嘗拾遺金百二十兩訪其人還之分毫

不染

崔思敬光化人父岳與同邑王寶友善寶司鐸大寧卒

於官貧不能歸思敬往奔其喪鄉里義之 以上舊通志

鄭陽府

明楊五保康人兄弟五人同居以射獵為業有勇名劉石二寇嘯聚山中欲掠遠安道經五所懼五不敢履其境乃以貨私五假道五佯許陰伏弩以俟賊覺不敢犯後賊平授千戶職辭不受 舊通志

直隸歸州

明王國芳歸州人嘗拾遺金一囊於路俄有二官差惶遽走覓勢將投水芳急呼訊之以原囊付還二人泣謝而去 邑志

義僕 附

武昌府

明李事從 李視篆蒲圻人雙流令李甲之僕甲討流賊死事從昌刃覓尸出遂以死殉視篆負骸厝名山縣翠峯庵後塔中因薙髮為僧居倚塔前有聞必告飲食必請枕席之間痛哭如相問答如是者八年篆亦歿托藏尸於弟子祭寰又十五年甲仲子葢珠移觀還里 舊通志

漢陽府

明蕭効用漢上諸生蕭堯案僕也巨猾孫景三劫案金捕逮急聚眾夜至案家手刃一老嫗遂誣案殺人竟論死効用覓人代列冤狀密鑄刃佩肘後值巡按大讞之

日効用左持狀右出刃大哭曰天平殺老嫗者蕭効用非堯案也卽就匆匆之再割然有聲巡按大驚改其案命負之出氣猶未絕尋指畫一七字七者案行呼也守者會意告曰若主得釋矣遂死而景三卒坐罪

舊通志

黃州府

明王九兒蕲水人州判王悅民僕也負擔隨主與流賊遇賊探其擔中得金問主人何在不言加之刃無懼色乘間肘悅民使去賊先剮其目次斷手每一揮刀問主所在終不肯言

王子兒諸生王三慎僕各被賊數鎗兩無生理主欲自投水中子兒力止之逃裹創負三慎山險風雨亂尸堆

積中走七十里竟抵家親串聚觀泣下如堵

以上舊通志

志

附增

明朱蘊錡楚藩宗室懷宗癸未獻賊之亂不屈死之

湖廣通志卷之六十四

湖廣通志卷之六十四

